

ՊԱՇՏՈՆԱԿԱՆ ԸՆԴԴԻՄԱԽՈՍԻ ԿԱՐԾԻՔ

Մկրտիչ Կարապետի Շաքարյանի «ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆՈՒՄ ԴԵՂԵՐԻ ՊԱՏՇԱՃ ԱՐՏԱԴՐԱԿԱՆ ԳՈՐԾՈՒՆԵՈՒԹՅԱՆ ԵՎ ԴԵՂԵՐԻ ՊԱՏՇԱՃ ԲԱՇԽՄԱՆ ԳՈՐԾՈՒՆԵՈՒԹՅԱՆ ՀԱՄԱԿԱՐԳԵՐԻ ՆԵՐԴՐՄԱՆ ՄԵԽԱՆԻԶՄՆԵՐԻ ԳԻՏԱԿԱՆ ՀԻՄՆԱՎՈՐՈՒՄՆԵՐԻ ՄՇԱԿՈՒՄԸ» թեմայով ատենախոսության վերաբերյալ՝ ներկայացված ԺԵ.00.01-«Դեղագիտություն» մասնագիտությամբ դեղագործական գիտությունների թեկնածուի գիտական աստիճանի հայցման համար

ԽՍՀՄ-ի փլուզումից հետո ԱՊՀ երկրներում դեղագործական տնտեսության տարերային ձևավորումը՝ համապատասխան օրենսդրական դաշտի և փորձի բացակայության պայմաններում, առաջ քաշեց բազմաթիվ հիմնախնդիրներ (տեղական և ներկրվող դեղերի որակի ապահովումը, դեղատների անհավասարաչափ բաշխումը, բնակչության դեղորայքային ապահովումը, անհսկելի ինքնաբուժումը և այլն), որոնք առ այսօր մանրակրկիտ ուսումնասիրության և գիտականորեն հիմնավորված լուծումների կարիք ունեն:

Այս տեսանկյունից Մկրտիչ Շաքարյանի ատենախոսական աշխատանքը, նվիրված Հայաստանում դեղերի պատշաճ արտադրական գործունեության (ՊԱԳ-ի) և պատշաճ բաշխման գործունեության (ՊԲԳ-ի) համակարգերի ներդրման մեխանիզմների գիտական հիմնավորմանը և մշակմանը, արդիական է և կարևոր նշանակություն ունի: Հետևաբար, միանգամայն ուշագրավ է ատենախոսի կողմից դեղի որակի ապահովման հետ կապված խնդիրների համալիր հետազոտումը՝ վերոնշյալ համակարգերի գործնական կիրառման հնարավորություններ ստեղծելու համար:

Անկախություն ձեռք բերելուց հետո Հայաստանի Հանրապետությունում ձևավորվեց նոր տնտեսություն՝ իր այնպիսի հատկանիշներով, որոնք բացակայում էին խորհրդային տարիներին (դեղատների սեփականաշնորհում, մրցակցություն, տեղական արտադրողների և մատակարարների թվի աճ, փոփոխություններ օրենսդրական դաշտում, շուկայական հարաբերություններ և այլն): Ժամանակը թելադրում էր ունենալ միջազգային պահանջներին և չափանիշներին բավարարող դեղագործական կազմակերպություններ՝ արտադրողներ և մատակարարներ:

Դեղը, առանց որի դժվար է պատկերացնել ժամանակակից բժշկական օգնությունը,

առանձնահատուկ ապրանք է. դեղի արտադրության, տեղափոխման, պահպանման և նույնիսկ ոչնչացման համար պահանջվում են հատուկ պայմաններ:

Դեղերի ողջ շրջանառության ընթացքում ՊԱԳ-ի և ՊԲԳ-ի ներդրման հարցը խիստ արդիական է, քանի որ այս խնդրի լուծումը մի կողմից բնակչությանն ապահովում է որակյալ, արդյունավետ և անվտանգ դեղերով, մյուս կողմից՝ առկա բարձր մրցակցության պայմաններում նպաստում է դեղագործական կազմակերպությունների (արտադրողների և մատակարարների) ապրանքաշրջանառության աճին:

Աշխարհի բազմաթիվ երկրներում դեղերի որակի ապահովման նպատակով ներդրվել են ՊԱԳ-ի և ՊԲԳ-ի կանոնները, որոնք այդ երկրների կարգավորող մարմինների կողմից կարևորվում են դեղերի շրջանառության, մասնավորապես՝ դեղագործական ընկերությունների գործունեության կարգավորման համար:

Քանի որ առանց դեղերի ՊԱԳ-ի և ՊԲԳ-ի համակարգերի ներդրման ՀՀ Առողջապահության նախարարությունը չի կարող երաշխիքներ տրամադրել, որ մեր երկրում շրջանառվող դեղերն արտադրվել և մատակարարվել են՝ ապահովելով դրանց որակը, տրամաբանական է, որ Մ.Շաքարյանի ստենախոսության հիմնական նպատակն է եղել մշակել ՊԱԳ և ՊԲԳ համակարգերի ՀՀ-ում ներդրման մեխանիզմների գիտական հիմնադրությունները:

Ատենախոսության ծավալը կազմում է 135 տպագիր էջ, բաղկացած է ներածությունից, գրականության ակնարկից, երեք գլուխներից, 185 գրականական սկզբնաղբյուր պարունակող գրականության ցանկից: Հետազոտությունները լուսաբանվել են են 13 աղյուսակներով և 16 նկարներով: Հրատարակված աշխատանքները և հետազոտության արդյունքների փորձաքննությունը լիովին համապատասխանում են թեկնածուական աշխատանքներին ներկայացվող պահանջներին:

Ատենախոսության «Ներածություն» բաժնում շարադրված է աշխատանքի հստակ նպատակը, և այն իրագործելու համար ստենախոսի կողմից առաջադրվել են բազմաթիվ իրատեսական խնդիրներ:

Գրական ակնարկում ներկայացված է ՊԱԳ-ի և ՊԲԳ-ի համակարգերի նշանակությանը առնչվող գիտական աղբյուրների համակողմանի ուսումնասիրությունը, ինչպես նաև տարբեր երկրներում դրանց բացակայության հետևանքների քննադատական վերլուծությունը:

Ատենախոսության երկրորդ գլուխը վերաբերվում է հետազոտության նյութին, կիրառված ժամանակակից մեթոդներին, համակարգչային ծրագրերին, որոնց միջոցով կատարվել են տվյալների հաշվարկը և վիճակագրական մշակումը:

Հեղինակի սեփական հետազոտությունների տվյալներն ընդգրկված են ատենախոսության 3-րդ գլխում, որտեղ հանգամանակից ներկայացված են դրված խնդիրների իրագործման արդյունքները և տվյալների վերլուծությունը: Իրականացված հետազոտությունների հիման վրա հեղինակի կողմից առաջին անգամ մշակվել է դեղերի որակի ապահովման գիտականորեն հիմնավորված, հայեցակարգային մոդել:

Աշխատանքի գիտա-գործնական նշանակությունը կայանում է նրանում, որ այն պահանջված է մեր երկրի առողջապահության և դեղագործության ոլորտները կարգավորող մարմինների կողմից, քանի որ աշխատանքում արծարծված խնդիրների լուծումը թույլ կտա մշակել ՊԱԳ-ի և ՊԲԳ-ի կանոնները ներդնելու, հսկելու և պահպանելու այնպիսի ուղիներ, որոնք համապատասխանում են և՛ միջազգային պահանջներին, և՛ Հայաստանի սոցիալ-տնտեսական պայմաններին:

Մ.Կ.Շաքարյանի ուսումնասիրությունների գիտական և գործնական արժեքի մասին փաստում են հետխորհրդային երկրների կողմից այս աշխատանքի հիման վրա կատարված առաջարկությունների կիրառումը:

Հետազոտության ընթացքում հեղինակն օգտագործել է տրամաբանական, հետահայաց վերլուծության, իրավիճակային, կոնտենտ վերլուծության, փորձագիտական գնահատման, վիճակագրական և այլ մեթոդներ, որոնք համապատասխանում են ատենախոսության նպատակներին ու խնդիրներին:

Ընդհանուր առմամբ բարձր գնահատելով աշխատանքը և ատենախոսության բովանդակության վերաբերյալ սկզբունքային առարկություններ չունենալով՝ այնուամենայնիվ, հարկ ենք համարում անդրադառնալ որոշ դիտողությունների.

1. Ուսումնասիրությունների մի մասն ատենախոսն իրականացրել է հարցաթերթիկային հարցման եղանակով, որի հավաստիության (վստահելիության) համար անհրաժեշտ են կոնկրետ թվեր և տվյալներ, որոնք բացակայում են. երբ է իրականացվել հարցումը, ովքեր են պատասխանել, քանի հոգի է մասնակցել հարցմանը, ինչպես է որոշվել մասնակիցների թիվը և այլն:

2. Ատենախոսության «Հետազոտության արդյունքները և դրանց քննարկումը» գլխում բազմիցս հանդիպում են գրականության հղումներ և վերլուծություն, որոնք առավել նպատակահարմար կլինեն ընդգրկել ատենախոսության առաջին՝ «Գրականության վերլուծություն» գլխում:

3. Ատենախոսության գործնական առաջարկություններից վերջինը, որով ատենախոսը ՀՀ կառավարության բնապահպանության ոլորտի լիազոր մարմնին առաջարկում է կառավարել դեղերի արտադրության ընթացքում արտանետումներից առաջացող ռիսկերը, գիտական հիմնավորում չունի, քանի որ մինչ այդ հեղինակը ատենախոսության մեջ այս հիմնախնդրին երբևէ չի անդրադարձել:

4. Կան խմբագրման կարիք ունեցող առանձին արտահայտություններ, բացթողումներ, վրիպակներ, որոնք, թերևս, մեծածավալ աշխատանքներում բացառված չեն: Օրինակ՝

- Կիրառված որոշ մեթոդներ հստակ նկարագրված չեն, նաև նշված չեն դրանց սկզբնաղբյուրները: Բացակայում են հարցաթերթիկների հղումները. պարզ չի՝ հեղինակն ինքն է կազմել դրանք, թե օգտվել է պատրաստի հարցաթերթիկներից:
- Աշխատանքի 88-89 էջերում ատենախոսը թվարկված կետերը ներկայացրել է որպես եզրակացություններ, որոնցից 5-ը ձևակերպված են որպես առաջարկություններ: Վերջիններս կարելի էր ընդգրկել վերջնական գործնական առաջարկությունների ցանկում:
- Ատենախոսության մեջ բացակայում է «Հավելված» բաժինը, որտեղ կարելի էր տեղադրել այս աշխատանքի դրույթների ներդրման ակտերը, որոնք հեղինակը ստացել է ԱՊՀ երկրներից, հարցաթերթիկների օրինակներ և այլ նյութեր:

Այս դիտողությունները հիմնարար չեն և չեն նվազեցնում ներկայացված աշխատանքի մասին դրական տպավորությունը:

Նկատի ունենալով այն հանգամանքը, որ ներկայացված հետազոտությունը կատարվել է թեկնածուական ատենախոսության շրջանակներում և առաջիկայում հնարավոր է ու անհրաժեշտ է շարունակել, վերոնշյալ դիտողությունները սկզբունքայնորեն չեն նսեմացնում ներկայացված աշխատանքի գիտական արժեքը, և Մկրտիչ Շաքարյանի ատենախոսական աշխատանքն իր գիտական մակարդակով,

արդիականությամբ, ծավալով, ստացված արդյունքներով, կիրառական նշանակությամբ
բավարարում է թեկնածուական ատենախոսության պահանջներին:

Այսպիսով՝ ԺԵ 00.01 - «Դեղագիտություն» մասնագիտությամբ դեղագործական
գիտությունների թեկնածուի գիտական աստիճանի հայցմանը ներկայացված Մկրտիչ
Շաքարյանի «Հայաստանի Հանրապետությունում դեղերի պատշաճ արտադրական
գործունեության և դեղերի պատշաճ բաշխման գործունեության համակարգերի
ներդրման մեխանիզմների գիտական հիմնավորումների մշակումը» թեմայով
ատենախոսական աշխատանքը ավարտուն գիտական հետազոտություն է,
բավարարում է ՀՀ ԲՈԿ-ի կողմից՝ թեկնածուական ատենախոսություններին
ներկայացվող 7-րդ կետի բոլոր պահանջներին, և ատենախոսն արժանի է ստանալու
դեղագործական գիտությունների թեկնածուի գիտական աստիճան:

Երևանի Մ. Հերացու անվան
պետական բժշկական համալսարանի
Դեղագործության կառավարման
ամբիոնի վարիչ,
դեղագործական գիտությունների դոկտոր՝

Մարգարիտ Հրանտի Բեգլարյան



Մարգարիտ Հրանտի Բեգլարյանի ստորագրությունը
ՀԱՍՏԱՏՈՒՄ ԵՄ

ԵՊԲՀ գիտական քարտեզարար,
բ.գ.դ., պրոֆեսոր՝

Տ.Գ. Ավագյան



«11» սեպտեմբերի 2020 թ.